

欽定剿平粵匪方略

欽定剿平粵匪方略卷五十一 癸丑年

七月十八日

辛酉

請爾經額奏言臣查黃河北岸

各渡口現駐有直隸弁兵自應不分畛域實力
嚴防惟南岸私渡如故縱使盤查嚴緊終無以
絕其來源且北岸縣長七百餘里豫省並無一

兵駐守僅恃直隸防兵一千數百名上下分撥
實有巡綽難周之慮撫臣陸應穀已於本月初

八日回省該撫係守土人員帶兵勦賊責無旁
貸乃所派防河查河官員有名無實據署藩司
張集馨詳稱夫役人等竟敢賣放私渡河南所
派委員不知去向但有一二差役在彼巡查等
語現值進剿喫緊而南岸放渡不已並無官兵
盤查豈能保無匪徒溷跡臣一人分兵派將守
禦稽查勢難周至若有貽誤關係非輕奏入

上命軍機大臣傳諭訥爾經額王履謙長臻陸應穀曰
據訥爾經額奏連獲偷渡人犯供係管渡夫役受賄
賣放且河南委員不知去向但派一二名夫役在河
岸巡查殊堪駭異著陸應穀查明南岸委員嚴叅懲
辦現在河南賊匪漸就肅清陸應穀已折回汴梁著
卽帶兵出省巡查河岸於上下游嚴防偷渡且可爲
河北聲援至河北道蔣啟敷本有地方之責現在防

河緊要著卽飭該員速回本任協同署河北鎮總兵
花里雅遜布於河北一帶口岸會同直隸所派弁兵
合力守禦並著長臻嚴飭河標弁兵協同地方文武
實力防守王履謙職司巡查大河南北均應兼顧如
有沿河員弁防守疏懈者卽著指名叅奏訥爾經額
統領大兵自當通籌全局不分畛域一體籌防

同日陸應穀奏言本月十一日接准總兵王家

琳咨報初二日寅刻趕至湖北宋埠地方探有賊匪折回當卽策兵前迎殲斃數名賊猶抵死拒敵我兵奮勇爭先施放連環槍礮戰至兩時之久殺斃長短髮賊一百十餘名日暮不及追趕當卽駐紮黃陂站正在移會湖北截剿隨准前任湖北布政使唐樹義來函竄出賊匪業經該省兵勇截擊當可殄滅淨絕奏入

上命軍機大臣傳諭陸應穀曰豫省逆匪南竄惟柏山
跟蹤追勦屢有斬擒王家琳此次帶兵勦截不過折
回零匪既經楚省知照無須前進而本省邊界餘匪
仍須實力搜捕不可以逐賊出境遂爲了事

同日張亮基崇綸奏言河南賊匪竄至羅山縣
距湖北孝感北界九里關及黃陂北界河口一
帶不遠臣等飛咨唐樹義迅飭都司善保等會

同鄉團防禦二十七日該匪竄入黃安縣聞官
兵已從山徑追至卽於是夜由東南竄去臣等
豫慮賊匪由麻城黃岡所轄各小河橫船關入
大江先飭鄒司董玉龍帶兵四百餘名駐紮團
風鎮復飛飭同知張曜孫等帶兵馳赴團風鎮
鵝公頸一帶地方扼賊由內湖入江之路前藩
司唐樹義亦馳赴黃安縣嚴督各軍兩路進攻

殺賊二百餘名賊卽分水陸前竄歧亭一帶沿河擄取竹箒圖出大江分擾適臣等所遣都司董玉龍張曜孫等帶兵已到遇賊力戰殺斃無算賊知官兵布置嚴密勢難出江始由湖折回辛家沖初三日同知伍煜等由東湖追賊至張家集賊匪見官兵揚帆追及紛紛梟水登岸淹斃無數生擒賊匪四十餘名奪獲賊船三十七

隻燒燬賊船十數隻奪獲騾馬四十匹其分竄
馬鞍山一股約千餘人亦經都司許連城等督
兵進剿斃賊二百餘名內有長髮賊五十餘名
生擒五十餘名賊勢已極窮蹙其成股者不過
二三百人餘皆薙髮棄械紛紛逃匿臣等豫飭
各州縣曉諭各鄉團遇有零星賊匪竄入境
卽行緝獻並飭各州縣將各要路多設陷穽水

路將船隻提開橋梁撤拆諒茲股匪或不致乘
虛免貽貽害鄰疆奏入

上命軍機大臣傳諭張亮基崇綸曰豫省賊匪由羅山
縣竄入湖北黃安麻城一帶經該署督等派委文武
兵勇夾擊獲勝曉諭各鄉團遇有零星賊匪竄入卽
行緝獻並飭將各要路多設陷穽水路將船隻提開
橋梁撤拆在置亦合機宜楚北當兵燹之餘豈堪再

遭蹂躪張亮基等務當嚴飭各路帶兵文武趁此賊勢潰散四面兜剿悉數殲除

張亮基又奏言臣准河南撫臣咨稱竄楚餘賊不過數百各州縣稟報則均稱萬餘其實由羅山仙花店入黃安及抵麻城縣所轄之宋埠確有三千餘人計自六月三十日接仗至七月初四日兵勇撿斬轟斃已近千名其溺斃逃散者

不計其數臣等密遣員弁查驗外江內湖浮出賊屍實已不少現尙分途兜剿是竄楚股匪不止數百確有明徵又據探報前月二十四日又有賊船千隻由湖口駛入江西號稱二萬合之現在攻撲江西省城之賊當不下兩三萬人是

由揚州江南兩處竄出之賊共計已有七八萬之多乃分竄河南江西之賊愈見其多而困守

江南揚州之賊仍不見少前此大營尙時有捷報近反闐寂無聞賊逸我勞賊銳我鈍師老餉竭言之寒心且長江自金陵至江西一千數百里毫無阻遏賊船來往自如前月初旬江西賊船百餘隻滿載米糧遠饋江南之賊今值秋成伊邇野有餘糧賊匪轉輸甚易恐江南之賊將無坐困之期或且乘閒突出大舉他竄尤屬不

堪設想伏乞

皇上申諭行閒文武各上平賊方略痛除諱飾延玩積
習俾得迅速蕩平奏入

上諭曰所見甚是現踞三城之賊未見有減於前而各
處分竄幾於策應不及不知以後之局若何惟有懇
祈

天鑒速赦民劫而已掩敗爲勝軍營通病每獲小勝極

力鋪張不知勝報到來朕必降旨獨不慮及爲賊所笑耶汝等旣出此言必應事事從實也

同日呂賢基李嘉端奏言查湖北逆匪自竄入黃安後於六月二十九日竄至麻城攻陷羅田初六日有賊千餘人撲入英山縣開監放犯初七日竄往太湖查太湖爲東至安慶北至廬州要路該匪甫經竄入必應速挫其鋒當經札令

遊擊凌慶柱督率該營官兵由潛山前進已革
遊擊賡音泰帶兵應援已革參將松安帶兵由
石牌河前進已革前任臬司張熙宇隨後應援
並飭已革臬司張印塘帶領現駐廬州之粵兵
三百名馳赴舒桐縣境相機進剿又檄調總兵
玉山等前來協力迎擊再派已革參將富惠等
在集賢關練潭寺地方擇要駐守以備兩路策

應奏八

上命軍機大臣傳諭周天爵呂賢基李嘉端曰逆匪分竄英山太湖亟宜翦除淨盡著該侍郎等卽責令帶兵各員扼要堵截合力勦洗並飭各該地方官及營汛員弁等認真防守城垣巡查江面毋任匪黨闖入同日恩華奏言查清化鎮在懷慶府東北四十里中隔沁丹兩河現逆匪所踞水北關已在沁

河東南僅有丹河之阻丹河除驟雨山水暴漲
平時處處可涉丹河迤東路徑叢雜皆通清化
清化迤東尤爲四通八達東自修武獲嘉新鄉
可抵衛輝稍南則由亢父陽武可達黃河北岸
稍北則與輝縣及直隸之順德廣平各屬在在
毗連連日獲匪訊供有剋日取清化之信已嚴
飭官兵晝夜防範查該匪自廣西出巢以來我

兵每皆尾追以致由南趨北徑渡黃河若不防
其北竄非獨衛彰兩郡震動尤恐震驚畿輔臣
故不敢遽離清化至大名等三鎮已飭其移營
前進與山東巡撫軍營聲勢尙相聯絡以目下
全局而論托明阿勝保等現旣俱在東南訥爾
經額又遠駐衛輝並難兼顧揆度形勢清化鎮
必須駐營現已咨商訥爾經額進紮清化臣俟

後路有防卽當移營前進奏入報

聞

同日

上諭內閣曰朕聞江南提督福珠洪阿於江甯省城失陷時奮勇殺賊力竭捐軀深堪憫惻前經降旨交向榮怡良許乃釗查明具奏迄今日久未據查覆福珠洪阿著先行交部從優議卹以慰忠魂所有任內一

切處分悉予開復應得卹典該衙門察例具奏仍著
該大臣督撫等將該提督如何殉難情形詳細查明
具奏旋經兵部議覆請將江南提督福珠洪阿從優
照都統陣亡例議給卹銀並給予騎都尉兼一
雲騎尉世職

上從之

十九日

壬戌

訥爾經額托明阿勝保奏言十二日

據懷慶府縣等密稟城中糧匱勢漸難支臣等
商定於十三日督兵進剿臣托明阿仍攻東面
善祿攻東南面臣勝保攻正南面齊撲賊壘先
有巡哨賊匪數百人直奔東面臣托明阿善祿
分投迎擊槍斃百餘人逆匪復由東南擁出數
百人擡運大礮施放我兵四路衝擊又殺斃一
百數十人始奔回土壘臣勝保一面分兵於各

壘放火喊殺阻其救援該逆猝不及防見有頭
裹黃巾身穿紅袍賊目十餘人手執令旗指畫
逆衆蟻擁而出我軍短兵相接殺斃賊匪二百
數十人多係髮長二三尺者彼時去南城門不
及一箭之遙而賊已處處暗窰陷坑且防其抄
截後路臣勝保因無兵接應未敢深入功虧一
簣憤懣實深臣訥爾經額卽日可抵清化前交

文冲統帶兵一千名已令副都統松玉總兵德坤先帶領五百名馳赴臣托明阿臣勝保軍營協剿其餘兵五百名現隨臣訥爾經額前赴清化以備相機策應並令前派遊擊吳璋速帶天津兵三百名趕赴臣勝保行營調遣惟有四面圍攻以期立解城圍奏入

上命軍機大臣傳諭訥爾經額恩華托明阿勝保曰逆

匪於懷慶城外深溝高壘負隅抗拒托明阿勝保督
兵分路進攻直入土壘去南城門不及一箭之遙乃
以後路無重兵接應不能深入以致功虧一簣懷郡
一城關繫河北全局現在城中米糧已匱若再不迅
圖解圍則城內人民勢漸不支該大臣現已前往清
化先派松玉德坤帶兵五百名馳赴托明阿勝保軍
營並令遊擊吳璋速帶天津兵三百名趕赴勝保行

營助勦當此攻勦喫緊托明阿等兵力較單僅派兵
八百名前往協濟仍恐未能敷用著該大臣再行添
派弁兵迅速前往再總兵郝光甲兵二千名由澤州
馳赴懷慶此時諒已趕到卽著該大臣飛飭前赴托
明阿善祿軍營聽候調遣

二十日癸亥長蘆鹽政文謙奏言查現在駐津官

兵因地方無統轄明文臨事不遵調遣恐誤事

機可否

欽派大臣一員來津或將驗米大臣孫瑞珍慶祺酌留
一員暫行駐津督辦防堵事宜卽駐津官兵亦
統歸管轄以一事權奏入

上命軍機大臣傳諭孫瑞珍慶祺文謙曰天津爲水陸
衝要拱衛京畿所有稽查奸宄彈壓地方均關緊要
現在海運漕糧將次兌竣孫瑞珍於驗收完竣後卽

著回京慶祺著留於天津專辦巡防事宜其現駐天津盛京官兵卽歸慶祺調度文謙雖無地方之責現當辦理防堵之際著該鹽政會同天津鎮道督率地方文武一體認真查察

二十一日甲子王履謙長蘅奏言伏查下游蘭儀

柳園等口已有直隸弁兵駐守惟上游孟津滎澤等口與懷慶賊營相近較下游更形喫重而

孟津口尤關緊要臣等商之直隸藩司張集馨
派撥河屯協兵二百名到彼協守其木藥店地
方現在祇有大同鎮兵二百名協同武陟縣鄉
勇一百名駐防恐不足以資捍衛臣等又飭令
該縣添募壯勇派員訓練互相策應至逆匪圍
攻懷慶月餘城中匱乏可知現在咨商勝保等
設法將糧食運進與城中聲勢聯絡庶得內外

夾攻迅解城圍奏八

命軍機大臣傳諭王履謙長臻曰現在懷慶尙未解圍黃河上游孟津滎澤等口距賊營較近自應嚴密巡防以杜竄越旣經王履謙等添調河屯協兵二百名移紮防守著卽照議辦理其木欒店地方應如何添募壯勇與官兵互相策應之處仍著妥爲籌辦王履謙係特命巡查東河渡口大員無論河岸南北上

下游均宜親身查看若但株守一處僅憑稟報難免
被人朦蔽著卽遵照前旨親歷河干上下巡察如官
吏人等有賄縱情弊卽著嚴叅懲辦長臻職司河防
責無旁貸並著督率沿河文武員弁會同各該地方
官將渡口船隻概行撤收嚴防偷越

同日

上諭內閣曰原任江甯將軍祥厚之子乾清門二等侍

衛恩全前已賞給二等輕車都尉世職著加恩照一等輕車都尉承襲六次襲次完時給予恩騎尉世襲罔替以示優卹忠盡之意

二十二日乙丑張芾奏言江省自六月下旬以來

雨多晴少攻勦頗難得力六月二十九日得勝門迤西城根有賊偷窆並有賊匪數百人乘勢攻撲當經江忠濟督率楚勇擊退斃賊數十名

初一日天晴臣張芾陳孚恩江忠源商令總兵
阿隆阿統領兩鎮各營官兵由永和門營盤分
三路進攻賊營已革臬司徐思莊所募各勇在
後接應糧道鄧仁堃知府林福祥所募之勇由
空心礮臺出隊各勇奮力迎勦賊衆卻而復前
知縣馬永熾督率衆勇向前擊退廣勇川勇貫
勇從東北兩路合擊殺賊數十名將賊營外房

屋二十餘間全行焚燬臣復商同江忠源派令
辰州撫州兵鍾祥勇由章江門出隊進攻楚勇
緹城接應賊眾拚死迎拒兵勇亦奮力殺賊統
計先後各處斃賊百數十名現在專候援兵會
剿乃湖南派兵勇三千數百名並向榮所派雲
南總兵音德布帶兵一千二百名因雨水阻滯
均尚未到而連日接據安徽臬司張印塘並彭

澤湖口等縣來稟均稱有賊船五六百隻乘風
駛上當遣人向前迎探果於二十八九等日到
省停泊旋即開赴上游此時省城未能分兵前
往已飭湖南未到之兵勇迎頭剿擊並令各府
縣地方文武設法守禦以杜滋蔓奏入

上命軍機大臣傳諭張芾陳孚恩江忠源曰逆匪攻撲
省城四十餘日屢經該撫及陳孚恩江忠源等督同

在事文武兵勇竭力守禦疊獲勝仗辦理均合機宜
此次各路兵勇復斃賊百數十名賊之兇鋒已挫譎
計已窮惟湖南所派兵勇並向榮所派音德布一軍
何以至今尙未趕到著該撫卽行飛催前途一俟援
兵到齊務卽約會內外夾擊以爲一鼓蕩平之計至
續來賊船五六百隻到省停泊旋卽開赴上游究竟
現往何處該撫已飭湖南未到各兵勇迎頭截擊並

令地方文武設法守禦務當嚴飭各府縣隨時偵探賊蹤相機防剿堵其紛竄之路

同日哈芬奏言本月十一日總兵郝光甲會同太原鎮烏勒欣泰帶同弁兵行至懷慶所屬之冉華有賊五六百名拒敵當經該鎮等親督官兵轟斃二十餘名賊匪卽向水北關逃走該二鎮所帶之兵現經山東撫臣李德調紮太行之

西兵力尙形單薄所有太行山大小口及垣曲一帶臣另撥弁兵四五百名協同防守以防賊匪偷越

哈芬又奏言本月十五日總兵郝光甲督同將弁由東路丹河直抵水北關繞向西北進攻會商尙書恩華巡撫李德三面會合行至水北關之西瞥見賊匪二十餘人卽開槍礮轟擊斃賊

十三名餘匪逃入木城奏入

上命軍機大臣傳諭哈芬曰總兵郝光甲由東路丹河直抵水北關繞向西北與恩華李德會合進剿現在勝保等軍營兵力較單若各路官兵俱截留丹沁兩河之北遙作聲勢於事何濟著該撫卽傳旨飭該總兵郝光甲將所帶之兵二千餘名迅赴勝保軍營以資調撥其烏勒欣泰所帶之兵仍咨李德酌量調撥

會勦至太行山南一帶該撫仍須嚴防要隘

二十四日丁卯王履謙奏言竊思賊匪渡河之後

非僅稽查所能了事急應添兵防守以遏南竄

豫省無兵可調直隸屢調不應河口標兵祇有

二百名其勢斷難分布臣上下巡查雖復諄飭

文武節節嚴防乃州縣責在守城呼應既多不

靈坐視徒深焦灼惟有據實直陳請

旨飭下直隸督臣訥爾經額派撥弁兵一千名交臣管帶以重河防奏入

上命軍機大臣傳諭訥爾經額王履謙曰現在懷慶城外各路進剿之兵勢難分撥著訥爾經額於防堵各兵內酌撥一千名或撥四五百名歸王履謙管帶以便巡查王履謙與長臻旣帶有弁兵自不必株守一隅王履謙著卽親赴南北兩岸上下巡查收集船隻

緝捕奸細不得藉口無兵稍形鬆懈訥爾經額現進
兵清化鎮後路已有聲援恩華亟應移營前進李傳
因山東緊要奏明回省所帶官兵已撥交勝保統領
其北面一路著訥爾經額恩華督飭帶兵各員與南
路會同夾擊務將丹沁兩河之間賊壘盡行鏟除迅
解懷慶之圍

同日李德奏言查總兵郝光甲烏勒欣泰先後

帶兵到營復准請爾經額忝稱前河督文沖行
抵清化鎮卽留防山東濮州之將軍瑞昌亦可
來豫協勦覈計續至官兵不下七八千名無難
合力翦除現在內閣學士勝保已歷次攻擊得
力臣曾將所帶陝甘兵五百名山西兵四百名
由原帶將弁咨明留交勝保統領並酌留一月
口糧銀一萬兩以資給發仍派知縣趙翼健王

蘭廣王萼等前往聽候差委 臣卽折回山東辦
理地方事宜並搜捕歸德一帶土匪以杜亂萌
奏八

命軍機大臣傳諭李德曰前因勝保兵力甚單疊經
諭令各統兵大臣分撥官兵調赴該營藉資攻剿現
據李德將所帶陝甘山西兵九百名由原帶將弁留
歸勝保統領並酌留口糧仍派知縣趙翼健等前往

差委自應如此辦理現在賊勢漸就窮蹙如果各路
重兵直抵城下合力進攻不難立解城圍該撫現因
山東本省緊要折回辦理地方事宜所有毗連歸德
之曹單等處應如何嚴防土匪搜捕奸細卽著妥籌
調度瑞昌仍著帶兵防守濮州等處毋庸前往豫省

二十七日

庚午

湖北提督向榮奏言臣查賊船游

弋江面下游艇船不能上駛極盼粵東紅單船

到後調赴上游擇要控扼使賊船不能往來自
如至金陵攻復事宜現在朝陽通濟等門該逆
均已嚴備又探得太平神策兩門凡山徑可通
之路該逆又已挖斷添築營壘數處東北隅無
隙可乘惟有先得雨花臺方能由南而西日來
先於龍脖子朝陽門一路進攻使之全力復趨
東面然後我兵再攻雨花臺俟辦有成效卽當

奏

聞奏八

上命軍機大臣傳諭向榮許乃釗曰金陵踞匪現在南門扼守甚堅該大臣擬先於龍脖子朝陽門一路進攻使賊全力復趨東面然後進攻雨花臺即可由南而西自係相機布置著卽督飭將弁兵勇奮力前進鎮江賊匪爲金陵外援若能設法先復鎮江翦其羽

翼則金陵賊勢自孤攻剿更易得手該大臣等務當
嚴飭和春督兵進取毋再延誤葉名琛等先後雇備
紅單船三十四隻計可陸續趕到卽著於江面擇要
調撥相機剿截並可與艇船合力夾擊以清江面

同日

上諭內閣曰前降旨將已革丁憂提督余萬清照刑部
所擬罪名定爲斬監候現在江南剿賊正當喫緊之

時余萬清著發往向榮軍營飭令帶罪效力儻再不
知奮勉卽於軍前正法

二十八日辛未琦善陳金綬雷以誠福濟奏言近

日三汊河官軍疊次獲勝大挫賊鋒沿江上下
雖有賊船往來未敢遽向三汊河深入賊匪久
困思竄防範應嚴十一日巳刻賊由徐凝門一
帶出城臣福濟派參將馮景尼率領兵勇擊退

斃賊數十人旋又有賊匪六百餘人出城分三路而來兵勇亦分三路迎敵斃賊多名餘賊紛紛遁入城內十三日巳刻陝甘官兵在鳳凰門攻擊適見賊匪從北門城頭縋下搭橋渡河約有七八十名直撲前來都司常萬清等迎頭勦擊同時西門迤南亦有賊匪百餘人縋城而下經參將鞠殿華那瑪善等擊斃三十餘名餘賊

由暗門竄入我兵急發大礮將其未及竄入者
轟斃十餘名現在 臣琦善 臣陳金綬扼其西北
臣雷以誠 臣福濟防其東南又經 臣琦善撥派
重兵在三汊河駐守自南門以西層層布置迅
圖收復又據總兵武慶等稟稱七月初八日在
浦口搜獲賊目李二等據供因揚城緊急扮作
乞丐由江浦繞赴江甯令早設計前來救應並

據知縣都察森稟稱有義勇頭目唐仁榮訪知湖廣船戶鄧三受賊旅帥僞職自江甯潛赴老河影地方爲賊招募夥黨赴揚州接應經唐仁榮帶領義勇往捕因該犯鄧三拒捕立時格殺並殺紅巾賊三名餘匪逃散等情臣琦善查浦口儀徵兩處防堵尙屬認真仍飭於江北各口岸晝夜巡防奏入

上命軍機大臣傳諭琦善陳金綬雷以誠福濟曰揚城
逆匪困守孤城望援甚切正當乘其窮蹙竭力圍攻
三汊河既有重兵駐守瓜州之賊無從於城內接應
江浦儀徵各口岸又經疊獲賊船木簞檢斬多犯是
各路外援無從闖入該逆食盡計窮每圖奔突著該
大臣卽會督諸軍迅籌克復務須嚴杜接濟解散脅
從該匪所搭浮橋悉數撤毀肅清河面毋令一船溷

入致奸細暗受雇募爲之勾結城內賊目尤須密籌
內應設法偵擒毋任竄逸

同日張芾奏言本月初六日有賊四五百人突
來京家山焚燒廟宇沿河放槍當經鎮勇等奮
力迎擊殲斃數十人賊衆敗竄上船臣遂令各
兵勇於初十日出隊分路進攻該匪仍負隅不
出但於牆孔施放槍礮廣勇鎮勇等繞至東北

七里街該逆約出數百人經廣勇等擊斃數十人焚燬賊踞之屋數十間而還先是賊船數百隻分竄上游臣等札飭湖南管帶兵勇候補道夏廷樾等從上游迎頭截擊並令各地方文武員弁嚴密防堵江忠源旋接伊弟候補訓導江忠淑函稱帶勇一千名自瀏陽縣取道前來舟次瑞州府之光義市地方猝遇賊船百餘隻當

用擡槍迎擊賊卽退回臣等旋探得瑞州府城
於初二日被賊竄入豐城縣城早被水淹賊到
卽焚城外廟宇並掠糧數船各該地方文武員
弁是否避匿抑因兵單未能固守有無殉難情
事應俟查明分別辦理十三日總兵音德布帶
兵一千二百名到省計湖南兵勇數日內亦可
到齊援兵俱至卽當設法進剿不敢延誤至上

游被賊窺擾臣未能先事豫防咎有應得請

旨從重治罪奏入

上命軍機大臣傳諭張芾曰江西城圍尙未能解而分股之賊肆行上窺忽又折回下駛往來自如並未經我兵勦擊以該撫現奏情形而論似省城可保無虞而江面毫無把握若不迅將省垣盤踞之賊勦盡則下窺之賊勢難分兵追擊必至任其蔓延現在江南

所撥官兵及湖南兵勇陸續趕到當可一鼓殲除所
有各兵勇應如何分撥留守追勦之處著與陳孚恩
江忠源等通籌全局布置妥辦

上諭內閣曰賊匪分股竄入瑞州府城並於豐城縣城
外焚廟掠糧雖經湖南兵勇沿途截擊上游賊船折
回下竄張芾究未能先事豫防著交部議處該地方
文武員弁是否避匿有無殉難情事並著查明具奏

同日呂賢基李嘉端奏言查七月十三日有賊船二百餘隻揚言由運漕河攻撲廬郡又聞逆匪竄入英山攻破太湖縣城西門焚燒縣署卽乘筏至石牌搶擄現於三橋頭插樹僞幟聲言欲竄集賢關練潭桐城各處臣等伏思桐城巢縣與廬州徑路交通尤虞各匪合夥竄撲刻下察看各路情形何處最爲喫重臣李嘉端卽會

同總兵玉山分別緩急親身督帶前往策應奏
入報

二十九日

壬申

請爾經額托明阿勝保奏言臣等

探得該匪有十四日四鼓攻撲郡城之說當於
是日子刻密遣馬隊多帶槍礮火彈暗伏林中
乃甫近賊壘忽聞城上施放槍礮之聲我兵卽

開礮向土壘轟擊餘匪奔竄入壘逆衆卽由東
南北三路蠡擁而來約計五千餘人僞天官副
丞相林鳳詳勒馬督陣經臣托明阿會同善祿
奮勇迎擊斃賊一百數十人該逆卽竄匿村中
空屋欲抄我兵之後復經臣托明阿善祿佯爲
收隊暗遣奮勇兵丁入村截殺逆衆忽分兩路
擁出臣托明阿善祿揮兵直前西凌阿明慶亦

三十一
帶領馬隊迎擊又斃賊二百數十人逆衆始奔
回土壘南路經臣勝保向黃旗林立處用礮轟
斃數十人賊少卻退旋又列隊撲來我兵奮力
向前復斃二百餘人忽見後路賊衆潮湧而上
分四股直撲陣前我兵馬隊分投衝擊復斃賊
百餘人此番逆匪實分十餘股傾巢而出以抗
我師今殲斃千有餘人賊膽已寒臣誦爾經額

現已駐紮清化卽會督各路官軍約期四面兜
剿務使悉數殲除不留餘孽

勝保又奏言近日接仗屢次獲勝十四日該逆
復傾巢而出被我兵痛剿後一味堅匿賊壘不
敢復戰且知臣力攻南門賊壘欲濟城中民食
該逆將槍礮器械盡運至南關木壘加意抵拒
並將進戰之所添挖深濠三道暗於濠內設伏

集三皇臣之田卷三十一
三十一
我兵進擊該逆深匿濠中槍礮如雨無從進戰
若不急籌良法恐城中食盡不支大局所關殊
非淺鮮現在蒙

恩特撥之天津兵三百名及副都統松玉前任總兵德
坤管帶之兵五百名俱已到懷並山東撫臣李
德由河北撥來陝甘官兵九百餘名計日可到
合之臣原帶步隊官兵共有三千餘名又馬隊

八百名兵力已集可以作速攻勦定於七月二十一日移營前進與賊巢偏近相距不過半里可期進戰得手以救懷郡危急

勝保又奏言濟源孟縣一帶爲郡城西南要路現在各路重兵均在東北兩面西南太覺空虛時有奸民接濟賊糧火藥情事臣業與托明阿商派馬隊步隊千餘名駐紮崇義鎮迤西之二

郎廟南路接濟自可斷絕惟查西南一帶道路
紛歧尙有七里屯小官路地方爲西路要道仍
有奸民接濟臣前經咨明陝甘督臣舒興阿請
撥精兵一二千名渡河來援現尙未據咨覆應

請

飭派帶兵大員迅速撥兵前往小官路及七里屯駐紮
不特目下可斷賊匪接濟愈可杜其西竄之路

同日訥爾經額恩華奏言本月十八日臣恩華親督官兵行至丹河之季村卽見河西多賊似有迎誘之勢當令馬隊先行過河圍剿賊卽披靡狂竄馬隊直前追殺共擊斃二十餘賊偏至樹林之內賊卽避入木柵我兵路徑不熟恐賊有伏不便輕進當皆勒馬排齊指揮步隊全行過河復令遊擊格洪額副將伊綿阿等列齊隊

伍長互二里有餘見木柵內有賊數百人窺探
伊綿阿格洪額當令督標兵弁分開兩隊先令
千總王朝棟等施放炸礮火箭轟擊斃賊百餘
並轟燬望樓二座木柵之內聲如鼎沸勢甚急
迫卽見有騎馬賊數百人向南逃竄當經副都
統托雲保等督令馬隊追擊又復殺斃百餘賊
惟時總兵郝光甲會同烏勒欣泰進勦水北關

一路將賊踞房屋概行燒盡斃賊三四十名旋見沁河隄上湧出馬賊百餘人欲撲我兵之後隨督飭署參將劉允和都司劉立亨奮勇直前又斃賊匪三十餘人趕入沁河死者無數是日臣恩華並郝光甲兩路共殺賊一千數百名臣等仍會督各路官軍四面圍攻以解城圍均奏

八

上命軍機大臣傳諭訥爾經額恩華托明阿勝保曰現在懷慶賊衆匿巢不出郡城尙未解圍必應四面攻擊使賊首尾不能兼顧方可聚而殲旃訥爾經額現已駐紮清化鎮恩華等卽可渡河合勦無難一鼓殲除該大臣等惟當懷遵疊次諭旨併力環攻其西路七里屯小官路等處仍應迅速派兵防守嚴斷奸匪接濟並可杜賊西竄之路至城中糧道如何能通亦

須設法籌運以資接濟

上又命軍機大臣傳諭舒興阿曰懷慶賊匪經托明阿勝保等屢勦獲勝勢已窮蹙現在我軍緊逼賊壘城圍指日可解惟西路兵力稍單防勦均關緊要著舒興阿於所帶官兵內遴選精兵一二千名派委得力將弁管帶由該督統領渡河與托明阿勝保等合力攻勦斷賊接濟迅解懷慶府城之圍並可杜賊西竄

之路其陝州一帶仍應派鎮將帶兵嚴防